



Sesida dals

Communitgà ils

Protocol nr.

18 da zercladur 2024

21 da zercladur 2024

537/2024

Incumbensa Metzger

concernent ina colliaziun stradala segira tranter Segl e Malögia
(Engiadin'Ota – Bregaglia)

Resposta da la Regenza

La rait da vias chantunalas traversa per gronda part territoris ch'èn exposts a lavinas, a crudadas da crappa e da blocca, a bovas ed ad ulteriurs process da gravitaziun. Savens n'èn tals eveniments betg previsibels u evitabels. En noss chantun ch'è topograficamain pretensius n'èsi betg pussaivel da garantir ina segirezza cumpletta en connex cun privels da la natira. Las ristgas tras privels da la natira sco er la commensurabladad da las mesiras vegnan determinadas sin fundament da reglas e recumandaziuns naziunalas e chantunalas. Il tractament da las ristgas sin la rait da vias chantunalas e la garanzia da la segirezza en il rom da las reglas reconuschidas è ina part da l'incarica dal chantun. Per garantir la segirezza èsi stà necessari da serrar il traject da Segl – Plaun da Lej durant ils ultims 20 onns en media per circa 2 dis per onn.

Tar il punct 1: Per incumbensa da l'Uffizi da construcziun bassa elavura l'Uffizi da guaud e privels da la natira (UGP) actualmain in concept da mesiras cunter crudadas da crappa e bovas per il traject Segl-Föglias fin Plaun da Lej, quai sco basa per elavurar e realisar suenter in project d'execuziun. Las mesiras da construcziun èn previsas a partir dal 2025.

Per la segirezza durant l'enviern èn vegnidas construidas e messas en funcziun gia il 2009/2010 trais pitgas per siglientar lavinas. L'onn 2022 èn quellas vegnidas cumplettadas cun sis ulteriuras pitgas per siglientar lavinas sco er cun in radar a lunga distanza. Suenter ils eveniments da la stad 2023 ord la Blais Parè (access Segl Baselgia) è il rempar existent vegnì auzà provisoricamain e cumplettà. In ulteriur radar per eruir crudadas da crappa registrescha eveniments en quest sector. Quest radar è collià cun in'ampia da traffic per serrar la via chantunala. Per il sector Blais Parè è ultra da quai vegnì elavurà – sut la direcziun dal UGP – in project d'exposiziun per mesiras da protecziun complementaras e definitivas. Las lavurs da construcziun duain cumenzar anc il 2024.

Tar il punct 2: L'Uffizi da construcziun bassa ha inizià gia l'avrigl 2024 dus projects da communicaziun. Per l'ina vegn incumbensada ina persuna spezialisada qualifitgada en il sector da la communicaziun da crisas, che duai far ensemen cun l'Uffizi da construcziun bassa in'analisa da la situaziun. Sin fundament da quai vegnan integradas las differentas gruppas d'interess sco vischnancas e regions ed i vegn definida la communicaziun. Sche bain igl è inditgà d'installar ina taskforce, n'è actualmain anc betg cler.

Per l'autra duai l'infurmaziun per las participantas ed ils participants dal traffic vegnir meglierada per lung da la ruta. Fin il proxim enviern vegn en quest connex optimada ed adattada la signalisaziun, quai per pudair garantir in reschim da traffic segir en cas d'in eveniment.

Tar il punct 3: In sboz dal project dal plan directiv dastgass esser disponibel fin la fin dal 2024, uschia che la publicaziun uffiziala po vegnir fatga suenter. Suenter la rectificaziun dal sboz prenda la Regenza il conclus il pli baud l'emprima mesadad dal 2025. Sche tut va bain, pudess esser elavurada fin ils 30 da settember 2025 l'adattaziun approvabla dal stadi da coordinaziun en il Plan directiv chantunal e vegnir sutmessà al Cussegl federal per l'approvaziun.

Tar il punct 4: L'elavuraziun dal project d'exposiziun en cumbinaziun cun il rapport necessari davart la cumpatibilitad ecologica (RCE) vegn incitada suenter che l'adattaziun dal stadi da coordinaziun en il Plan directiv chantunal è vegnida approvada. Tenor l'experiencescha na basta la perioda dad 1 onn betg, per elavurar il project d'exposiziun cun RCE per in project da tala dimensiun. Pir cura che l'adattaziun dal plan directiv è approvada cun vigur legala e disponibla, exista ina segirezza da planisaziun per il project d'exposiziun. Perquai na pon ins betg cumenzar pli baud cun questas lavurs.

Sin basa da questas explicaziuns propona la Regenza al Cussegl grond d'acceptar l'incumbensa qua avant maun concernent ils puncts 1, 2 e 3 e da la midar sco suonda concernent il punct 4:

4. d'elavurar il project d'exposiziun e d'al suttametter per l'approvaziun uschè svelt sco pussaivel, suenter ch'il Cussegl federal ha approvà l'adattaziun en il plan directiv (cf. cifra 3 qua survar).



En num da la Regenza

Il president:

Dr. Jon Domenic Parolini

Il chancelier:

Daniel Spadin